

AKASHVANI AIZAWL

HEADLINES (EVENING)

- Nizan dar 9 leh a chanve thleng khan tuialhthei phur tanker truck 50 vel Vairengte-ah challan siam sak an nih thu leh tuialhthei dinhmun a zia-awm beisei a nih thu Supply department-in an sawi.
- Myanmar raltlante kutzia leh mit-naute lakkhawm hna chu harsatna dang a awm loh chuan tunkar chho hian Lunglei district-ah tan hman tum a ni.
- MYC kaltlanga British Army-a tang duh, Mizo tlangval 247 dilna thehlut atanga mi 5 koh zingah mi 3 in British Army an zawm fel tawh.
- Prime Minister Narendra Modi-a’n kum zabi 21-naa science lama India hmasawn chak dan chu a chhuanawm hle a ni, a ti.

<><><>

OIL SCARCITY

Nizan dar 9 leh a chanve thleng khan tuialhthei phur tanker truck 50 vel chu Vairengte-ah challan siam sak an nih thu leh tuialhthei dinhmun a zia-awm beisei a nih thu Food, Civil Supplies & Consumer Affairs department hotuten an sawi.

Nimin khan Supply minister Pu B. Lalchhanzova’n Vairengte tlawhin Vairengte a Indian Oil Corporation Limited (IOCL) Oil Depot Manager chu a pisa-ah a kawm a, tuialhthei phur motor 60 chuangin Mizoram an rawn lut mek tih Manager hian a lo hrilh niin ZPM thuchhuah chuan a sawi a. Supply Minister hian Kudam tlawh nghalin tun dinhmunah Vairengte Kudam-ah buhfai quintal 6,000 chuang a awm mek a, kumin November thla thleng daih tura an ngaih thu thawktuten an lo hrilh bawk niin ZPM thuchhuah chuan a sawi a ni. Petrol leh diesel hi filling station thenkhatah lo thleng awm ve leh thin mahse, lirthei neitu leh khalhtute'n harsatna an tawh rei tawh avangin a zo nghal deuh mai zel ni a thudawn a ni.

Mizoram chak lak luhna kawngpui NH 306 leh 06 a chhiat avanga tuialhthei phurte an tlan ngam loh avangin Aizawlah petrol leh diesel a vanga, kar kalta Nilaini vel atang khan Aizawl kawngpui dungah lirthei veivak a tlem chho tan tawh hle a ni. Zirtawpni tlailam atanga tuialhthei phurtu pawlin an nawrh an tihtawp hnu-ah pawh Aizawl leh Silchar inkar kawngpui a chhiat nasat em avangin an tlan chak thei lova, an kal hun chhung a rei avangin petrol leh diesel hi a thleng muang hle a ni.

Wawiin chawhnu lam atang khan Aizawl leh Silchar inkar kawngpui a lirthei tangkhang khalhtute eitur sem tan a ni a. Supply minister ruahmanna siampui zulzui-

in lirthei tangkhang khalhtute hnenah hian buhfai, tel, dailuah, purun sen leh tui in tur sem a ni.

Hetih lai nian nizan khan rorellai ZPM Legislature Party thukhawm chuan Kawnpui leh Sairang inkar kawngpui chhe siam mek chu Minister leh MLA pahnih talin nitin tlawh ziah ni se tih an rel a. Thutkhawm hi PWD Minister Pu Vanlalhlana'n a kaihhruai a, Minister leh MLA 16 an tel a Mizorama chaklakna kawngpui siam hnathawh chak thei lo leh hemi avanga mipui tawrhna thleng mek chu pawl thu leh ,hna hmanhmawhthlak thawh dan turte relin mipui harsatna a rang thei anga sut kian dan an rel a ni.

Kawng siam thatna atana hman tur lung (boulder) pawh Mizoram pumah a lakkhawm theih dan kawng dap ni se,an ti a, kawng chhiatna hmunah hian, PWD thuneitu sang chinin awm chilh se an ti bawk a. ZPM Legislature Party hian he kawngpui pawimawh avanga harsatna a taka vil turin Crisis Management Committee an din nghal bawk a ni.

<><><>

VEG VENDORS

‘Mahni Thlai Thar Zuar Pawl’ ti a invuah Mizo hmeichhia an thlai thar zuar thinte chuan Aizawl a chawlhkar khatah vawi 2 tal kawng sira thlai zawrh phalsak an phut.

Mahni Thlai Thar Zuar Pawl hian tun hnai khan thuchhuah siamin an harsatna tawhte an tarlang a. Sorkar leh mipuite chu Aizawl khawpui a lirthei veivak dinhmun hre chung a ei zawn theihna chanvo an neih hriatsak turin an ngen a, hemi atan hian chawlhkar khata ni 2 tal kawngkama an thlai tharte an zawrhchhuah phalsak a hrethiam turin an ngen a ni. An pawl chuan Aizawl khawpui kawngpui ticheptu chu kawngpui sir ke a kalna a lirthei hunte, insakna bungraw dahte leh chawhmeh zawrh chungchanga harsatna awnte an hriatthiam thu an sawi a. Aizawl khawpui vawn thianghlim chu an duh ve tho rualin kawng kama mahni thlai thar zuara eizawng hmeichhiate zawng zawng khapsak vek an nih chuan an eizawnna-in a tuar hle dawn niin an sawi.

Mahni thlai thar zuartu pawl chuan thingtlanga an thlai thar tharlam tak tak khawpui a an zawrh zui zel theihna atan sorkarin ruahmanna fel zawk siamsak se an duh thu an sawi a. Chuti lova an eizawnna tihtawpsak ngawt chu India Constitution article 21-na bawhchhiatna a ni, an ti a. Mizo hmeichhia mahni thlai thar zuarte chu zahawm taka eizawngtu an ni tih sawiin central sorkarin hmeichhe kuthnathawkte chanvo a humhalh anga humhalh ve turin Mizoram sorkar an phut a. Sorkarin ruahmanna fel zawk a siam hma chuan chawlhkar khata vawi 2 tal kawngpui kama an thlai tharte zawrh phalsak an ngiat a. A nih loh chuan dan tlawhchhana hmalak an tum thu an tarlang a ni.

‘Mahni Thlai Thar Zuar Pawl’ adviser Dr. Lalrindiki Ralte chuan hemi chungchang hi hetiang hian a sawi.

(Byte Dr. Lalrindiki Ralte,)

<><><>

BIOMETRIC ENROLMENT

Myanmar raltlante kutzia leh mit-naute lakkhawm hna chu harsatna dang a awm loh chuan tunkar chho hian Lunglei district-ah tan hman tum a ni.

Thudawn danin Myanmar raltlante kutzia leh mit-naute thla lakkhawmna tur Foreigners Identification Portal (FIP) a data lo thun chhin tawhte chu Ministry of Home Affairs (MHA) lamin an thian fai mek a. MHA in an thenfai vek hma chuan engmah lo thun tawh lo turin an inhriattir a, biometric data lo lakhawm tawh an awm pawhin lo chhonzawm lo turin an hriattir bawk a. MHA lam hian an thenfai zawh hman chuan Lunglei district chuan Myanmar raltlante biometric enrolment hna hi engtik lai pawhin an tan thei reng tawh tih district thuneitute’n Akashvani Aizawl an hrilh a, July thla chhung ngei a tan nghal thei turin an inpuahchah fel vek tawh a ni, an ti a, District dang thenkhat official-te pawhin ruahmanna an peihfel tawh thu an sawi bawk.

Tun July thla chawhnu lam atanga tan tum, Mizorama Myanmar raltlan awmte biometric enrolment kalpui tanna tur atana sum ruahman chu cheng nuai 38 a nih thu home secretary Pu Vanlalmawia'n a sawi a. Ngawrh taka inpuahchah chhovin July thla chhung ngei a tan hman tura ruahmanna siam a nih thu leh cheng nuai 38 hi a bul tanna atana senso ngai zat tur a nih phawt thu a sawi bawk. Senso zawng zawng hi MHA tum vek tur a ni chungin hna tan hi a hmanhmawh thlak tawh si avangin Mizoram sorkar sum lo hman phawt a ni dawn ni a thudawn a ni a. Neih sa bakah computer, web camera leh hmanraw pawimawh dangte lei belh ngaite lei belh mek zel a ni bawk. Enrolment portal hi National Informatics Centre (NIC) duan a ni a, Myanmar raltlante chhinchhiahna atan hian Foreigners Identification Portal & Biometric Enrolment (FIP&BE) chu hman a ni dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MYC

Mizoram Youth Commission (MYC) Chairman Pu Malsawmzuala Ralte chuan MYC kaltlanga British Army-a tang duh, Mizo tlangval 247 dilna thehlut atangin mi panga koh zingah mi pathumin British Army an zawm fel tawh thu a sawi.

Pu Malsawmzuala Ralte chuan British Army-a tan dil Mizo tlangvalte chuan kohna an hmuh belh zel an beisei thu a sawi a, British Army training hun chhung chu kar 8 vel a nih tlangpui thu leh training lai atangin India pawisa cheng nuai 2 thla tin an hlawh thin thu a sawi a. Sipai an zawm hnu reilote-ah thla tin India pawisa cheng nuai 3 an hlawh vat thu sawiin Mizo thalai hrisel tha, zai pui la tawh lemlo tan thil huphurh awm a nih lem loh thu leh British Army-a kum bithliah chu kum 18 atanga kum 37 inkar a nih thute, thiamna lamah pawl 12 pass an pawm thu leh Mizo thalai dil duhte tan ram danga zin theihna passport neih a ngaih thu te a sawi bawk.

Akashvani correspondent nena an inkawmnaah MYC Chairman chuan Mizo thalaite tana hma an lakna huang zau zawka kalpui a nih theih na’n Corporate Social Responsibility (CSR) haichhuah kawngah pawh theihtawp an chhuah thu leh kum khat leh a chanve chhungin CSR atang hian cheng nuai 63 vel an hai luh tawh thu a sawi a. MYC-in hotel management zirna a kalpui chu Honda company te’n a tul ang zawng zawng, zirtirtu hlawh thlenga an tumsak thu sawiin nikuma zirlai batch nga an neih leh kumina zirlai batch thum an neih zirna senso belhkhawm cheng nuai 14 vel chu Honda company hian an tumsak vek thu a sawi bawk.



MANN KI BAAT

Prime Minister Narendra Modi-a’n kum zabi 21-naa science lama India hmasawn chak dan chu a chhuanawm hle a ni, a ti. Vawiin Akashvani-a Mann Ki Baat hun a hmanna-ah van thengreng atanga Indian Air Force Group Captain Shubhanshu Shukla lo kir leh chungchang tarlangin him taka leia a lo tum leh chu ram pumin an chhuangin lawmna-in an khat a ni, a ti.

Prime Minister chuan naupangte zinga thil thar duan chhuah chakna tuh turin Inspire-MANAK Abhiyan kalpui mek anih thu sawiin he campaign hnuaiah hian sikul tin atangin naupang 5 zel thlan chhuah an ni, a ti a, tunah chuan naupang nuai tel an tel tawh a ni, a ti.

Tun hnaia Dubai-a International Chemistry Olympiad neiha medal dawnga ram hming tiropuitu India zirlaite leh Australia-a International Mathematical Olympiad-a India aiawh zirlaiten gold medal 3, silver 2 leh bronze medal 1 an la thei chu chhuanawm a tih thu a sawi a, thla leha Olympiad lian ber tur, Mumbai-a Astronomy leh Astrophysics Olympiad neih tur chungchang pawh tarlangin ram 60 chuang atangin zirlaite an tel dawn a ni, a ti a, tunah chuan Olympics leh Olympiad-ah India-in hma a sawn tawh hle a ni, a ti.

